



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : f Tir Yimiyim tiryimiyim@aolima tir yimiyim TAPAK 3



Tunisia nung tir candidate
Abir Moussi pua ayu



Linuk nung Backward Classes
indang census agitsula: Kharge

VOL. XX NO. 354 (ADOK 354) DIMAPUR YANGTEPNÜ (THURSDAY) MONGPUTENI (OCTOBER) 05, 2023 ₹ 5.00

LPG Cylinder nung subsidy Rs 300 agütsür

New Delhi, October 4, 2023

(Agencies): Prime Minister Narendra Modi-i aniba Centre sorkari Bodbarnü Pradhan Mantri Ujjwala Yojana (PMUY) beneficiaries nem subsidy teimba agütsütsü osang metetdaksüogo.

“Sorkari Pradhan Mantri Ujjwala Yojana beneficiaries nem LPG cylinder shia Rs 200 agütsüba nungi Rs 300 kümstüogo” ta Union minister Anurag Thakur-i ashi.

Union Cabinet-i taküm August ita domestic LPG cylinder shia nung Rs 200 subsidy aser Ujjwala scheme beneficiaries nem subsidy Rs 200 agi teimba kümstütsü mulunga agizük.

PMUY ya takok anguba social welfare scheme ka ta tenüngsang agütsür aser iba

ajanga 2016 nung LPG penetration 62% aliba tangbo 100% jungnüa kümogo.

Taoba ita Union Cabinet-isa Pradhan Mantri Ujjwala Yojana (PMUY) atsülangtsü mulunga agizük. Iba ajanga Financial Year 2023-24 nungi 2025-26 tsüngda LPG connections lakh 75 agütsütsü.

Küm asem atema PMUY maparen nung Centre sorkari Rs.1650 crore endoktsü.

14.2 kg Single Bottle Connection – Rs.2200 per connection

5 kg Double Bottle Connection – Rs.2200 per connection

5 kg Single Bottle Connection – Rs.1300 per connection

Ujjawala 2.0 nung lateta aliba ama Ujjwala beneficiary nem mezüngbuba LPG refill aser stove angati agütsütsü.

AKM lenir Achet Mollier alima nungi pilaogo



Asür Inmayachet Mollier (file)

Dimapur, October 4, 2023

(TYO): October 4, 2023 anepdang 11:00 ako meta Chümoukedima district kübok Patkai college by-pass anasa gari lendong ka nung nisung ka asü.

Iba nisung ya Mongchen nung Inmayachet Mollier ta jangjaogo aser pa ya AKM nung Social and Culture Secretary aser Dimapur Ao Youth Organisation (DAYO) Foothill Unit nunga Media Secretary teinyakdak liasü.

Asür Inmayachet ya motorbike ka nung mener Kuhobotu nungi Mokokchung-i aodang JCB Backhoe gari ka den tsüktep. October 5, 2023 anepdang 10:00 ako nung pa den asüpila sentep sentong agitsü.

Asür Inmayachet Mollier asüba atema AKM-i anir telok balalai mangyimba osang lemsatepogo.

“Inmayachet Mollier ya Official duty atema senzüdang lendong ajuru. Pai AKM atema kanga dang bendanga agüja aser jangrabangra inyak aser pa asüba ya takoksa ulura lir” ta AKM-i sangdong ka nung metetdaksü.

“Mokokchung district kübok aliba school aser shisaliok reju ajak nung minute ka ola madoki asür nem tetushi agütsütsü ayongzüker. Pai AKM aser asen lokti atema inyakba bilemteta akhümtsüba agütsüdi” ta AKM Tir Lanutoshi Aier aser Tongti Tezüür Satemmongba nati ashi.

AKM-i par kibong aser temeimertem asoshi bilemtsür. Nenok nem tashi aser tesünap agüjangma ta mendenpurtemisa ashi.

“Anü teroto nung ajungbena mepet süloka manga aküm medem shingaia meimlaba mapang ajungben lendong nung Sp. Inmayachet Mollier, Social & Culture Secretary Ao Kaketshir Mungdang asüba osang angashia kanga aoksar aser nemjemseta bilemer” ta Ao Senden-ia sangdong ka nung metetdaksüogo.

“Teyakyak lenir Ao kaketshirtem anitsü asoshi shimteter inyaka aoba mapang ano Ao Kaketshir Mungdang maparen asoshi jajadang ajungben lendong nung taküm samaba asoshi kangasa sasaseter. Asür leniri toktsüba ongdang tulu aser takoksa ulura asütsü rataseta bilemer. Asüri toktsüba Ao Kaketshir Mungdang, Tsürabur aser kinungertem ajak nem iba ama tejashi mapang nung tesünap agüjang ta Tsüngrem dang mepishitsür aser Ao Senden mendenti ajanga asüku lemsateper” ta Tir Chubawati Longchar aser Tongti Tezüür Imtipokyim nati sangdong nung shia lir.

Maneni, Mokokchung Town Lanur Telongjem-ia tanga sangdong ka nung Yachet Mollier asüba osang angashia kanga aoksaba osang metetdaksüogo.

“Lenir tajung ka tebenjem mapang nung asüba ya Naga nung aser talisa Aor asoshi takoksa ulura lir. Asüri toktsür aoba kinungertem nem Tsüngremi tashi aser tesünap agüjang ta sarasademtsür” ta MTLT Tir Imnaonen Pongen aser Tongti Tezüür Imkongchuba Pongen nati sangdong nung shia lir.

Minister C L John-i süngdonglidong aser shiruru kümzüktsü ayongzüker



Wildlife Week tenung nung Bodbarnü Nagaland Zoological Park nung Forest department staff 4 nem sempet agütsüba sülen agiba noksa angur.

Dimapur, October 4, 2023

(TYO): India nung kümshia October 2 nungi 8 tashi National Wildlife Week amonger aser iba ya süngdonglidong aser arem shiruru kümzüktsü aser wazüka ayutsü atema amonger ta Environment, Forest & Climate Change Minister C L John-i ashi.

Bodbarnü Nagaland Zoological Park, Rangapahar

nung Wildlife Week benjung amongdang Minister John-i iba ya benjung ka dang masü saka arem shiruru aser süngdonglidong wazüka ayutsü osang prokshitsüba mapang ka lir ta ashi.

Iba benjung tenung nung Forest department staff 4 nem sempet agütsü. Parnok ya Forest Guard Y Limthure

Yimchunger, Animal Keeper Bhola, Forester I Hukai H Zhimo aser Range Forest Officer Lansothung Lotha nung lir.

Iba sentong nungsa Commissioner and Secretary, Environment, Forest & Climate Change Y Kikheto Sema aser Chief Wildlife Warden Vedpal Singh natia o jembi.

NHAK nung shiranger anükertem asoshi guest house lapokogo

Dimapur, October 4, 2023

(TYO): Naga Hospital Authority, Kohima (NHAK) nung shiranger anükertem sen dalang agi ‘Patient Attendants Guest’ house nung amongtsü akok.

Iba ‘patient attendants’ guest house ya Kohima Ao Baptist Arogo (KABA)-i yanglur tenla agütsüba lir ta Poor Patient Fund Committee, NHAK (PPFC, NHAK)-i metetdaksü.

NHAK ‘Patient Attendants Guest’ house nung takdang shia yipden anana lir, metsümeshidak, sitting room, joka den gas connection aser chibo aonbatem lir aser sen dalang agi amongtsü

akok. Guest House nungsa Manager inhouse ka lir.

“Mezüngbo iba guest house ya Covid-19 frontline health-workers anenzüktsü atema amshia liasü” ta PPFC, NHAK convenor Dr. Pfukrolo Koza aser co-convenor Dr. N. Azo Louis Kharutso nati sangdong ka nung ashi.

“NHAK, Managing Director aser Medical Superintendent nati iba guest house ketdangtsütsü mapa lemzüktsüba atema kanga pelar. Iba guest house nungi anguba sen ya nungdabapur shirangertem yariba nung dang amshitsü” ta PPFC, NHAK-i

metetdaksü.

Ayushman Bharat (PM-JAY) aser CM Insurance Scheme amala nungi teyari agiaka shiranger aika mozü kidang amongdang ano teyari balala nungdaker. Iba atema shiranger anepaluba doctor tem dang nungi osang meshir PPFC, NHAK ajanga nungdabapur nem senotsü teyari agüja arur.

2023 küm tsüngda shiranger 145 nem senotsü teyari agütsüogo. NHAK nung shirangertem yaritsü atema public aser civil societies-i mulungsoa tenlatsü mepishir, ta PPFC, NHAK-isa metetdaksü.

Mahila Band nem vote enoktsütsü ayongzüker



(TYO): Nagaland DGP Rupin Sharma, IPS-i October 3, 2023 nü Chief Minister Neiphiu Rio den ajurutepa senden ka amendang tenati Mahila Band osang lemsatep.

India’s Got Talent nung Mahila Band ajanga shilem tajung agiba atema kanga pelar aser tenüngsang agütsür ta CM Rio-i Rupin Sharma dang ashi.

CM Rio aser pa kinungtsü nati Mahila Band nem vote agüja aruba osang lemsatep.

CM Rio-isa DGP Rupin dang

kübok aliba ketdangtsürtem aser staff den kinungertem Mahila Band asoshi vote enoktsütsü atema ayongzütsü ashi.

“Iba nungji ajemdaker AHODs aser HODs-i pei pei staff dang tan hopta tatemlen Mahila Band nem vote enoktsütsü atema osang sangoktsütsü mepishir” ta Rupin Sharma-i sangdong ka nung metetdaksüogo.

India’s Got Talent nung Mahila Band nem vote enoktsüba inyakyim lemsateptsü, ta paisa ashi.

Sony Entertainment Television ajanga ayongzüka agiba “India’s Got Talent” Season 10 nung IRB Mahila Battalion Band ajanga shilem tajung agia arudar aser Top 10 rongnung densemogo.

Mahila Band-i shilem tajungba agiba ajanga linuk kübok tesem ajungalen nungi parnok sapurtem aika kümogo. Parnok nem “India’s Got Talent” nung judge Badshah-i golden buzzer asem aser judge Kiron Kher-i golden buzzer ka agütsüogo.

Mahila Band nung tang züngsem 10 lir aser parnok rongnungi nisung 8-i sabang nung shilem agir.

Züngsemtem- Hav’ R. Shoyanla (Acoustic & Backing vocal); Hav’ Tonchingsangla (Bassist); C/N Sashitsungla (Guitarist); C/N Inaholi (Rhythm & Backing vocal); C/N Wetsolo-ü Lomi (Keys); C/N Tolito Shohe (Vocalist); NCE Nokmalemla (Vocalist); C/N Sanenla (Tambourines); C/N Epfutsutshou: Keys (Standby) aser ABSI Ng. Saka Band I/C.

Fazl Ali College nung International Conference kadagi



Fazl Ali College nung International Conference kadagi aser October 4 nung mezüngbuba sentong temer kelen tetushi tejaoker Nagaland University Vice Chancellor Prof. Jagadish K. Patnaik, Prof. Murali Sivaramkrishnan, Dr. I. Wati Imchen aser ketdangsürtem külemi tangokba noksa.

Mokokchung, Mongputeni/October 4 (TYO): Fazl Ali College nung tanu nungi tenzüka International Conference On Environmental Humanities in the Anthropocene Era: Ecojustice and Sustainability omen nung ajemdaker kadagi.

Tanu iba conference tenzüka sentong nung Nagaland University Vice Chancellor Prof. Jagadish K. Patnaik-i tetushi tejaoker o jembidang alima nung temelenshi tulu bener arutsü dak rangloker iba ama omen nung ajemdaker International Conference tashi katettsüsa achayanga ayongzükba asoshi Fazl Ali College nem tenungsang aguja ashi.

Alima nung tiptema litettsüsa meimchirtemi tzu mupong aser yangji aliba kechisarenaji wazüka meyura asenok jakdang lendong tulu lir, asenoki bilemba aser asadanga ajak nung tzu mupong asüngteta wazüka ayutsü asoshi bilema inyaksüla Vice Chancellor-isa ashi.

Iba ama omen tulu tamendakba nung ajemdaker International Level Conference tashi ayongzükba akaba yabo Nagaland state nung college

rongnungbo mezüngbuba asütsüta Fazl Ali College nem tenungsang aguja ashiba den iba Conference nung pangzüng tajung kar renemer ketdangsüa inyaka aotsülata ayongzükba jembia.

Sentong nungsa Founder & President Association for the Study of Literature and Environment India Prof. Murali Sivaramkrishnan-i iba conference omen nungtem nung ajemdaker jembidang alima tzu mupong jagi asenok den noktaker mejembitsü saka parnokki asenok yaribaji jungkai adoka sayutsü, anungji asenok meimchirtemi ibaji angateta tzu mupong wazüka yua alima nübur anisüngzükdaksüba mapa inyakteta conference nung adenshia alirtem ayongzükba jembia.

Prof. Murali-isa alima ya asenoki mekazüka mali saka asenoki alima ya wazüka ayutsü asoshi mapatong balala inyaktettsü, India linük ya kodang reprangdangdir North Eastern states, India southern part, India northern part aser central India nunggerji reprangdangra liba liro, achi ajem aser sübosolem

khenyongi balala lir, ibaji kecha agia masu saka alima tapak balala yariji aji oda alitsüsa akumer aser aji tanu iba conference omen ajanga asenoki angateta inyaka aotsü tangazükba agidita ayongzükba jembia.

Tanu iba conference tetenzükba sentong nung Fazl Ali College Principal Dr. I. Wati Imchen-i tarur aser sentong nung shilem agitsüpurtem pela agizükba jembia aser College nung shisashirtemi sobaliba saya tajung sayaba ajanga telok ajungmesoba den Asso Prof. Dr. Lanurenla ketdangsüba nung iba sentong agia liasü.

Iba International Conference ya asung October 5 nü tashi agitsü sentong tarensena renema lir aser item sentong balala onük balala nung Rtd. Commissioner & Secretary L. H. Thangi Mannen, Dept. of Environmental Science Tezpur University Prof. Ashalata Devi, Team Leader, Lemsa Chen Lok Longleng Y. Nuklu Phom aser Freelance Academician & Reseacher Kanglung, Bhutan dr. Pankaj Thapa parnokki jembitsü renema lir.

10th Nagaland Spelling Bee Championship tanü tenzüker

Kohima, Mongputeni/Oct. 04 (TYO): Fountain Club ajanga State Council of Educational Research & Training (SCERT)

Nagaland den lungjemer 10 buba Nagaland Spelling Bee Championship 2023 sentong RCEMPA, Jotsoma nung October 5, 2023 nü tenzüksü. Iba sentong ya ananü asoshi lir.

Iba sentong ya Advisor, Water Resources Department, Tongpang Ozukum-i anepdang 9:30 ako nung "Bee Guest" ka ama lapoktsütsü.

Sentong ayongzükba nükjidong Director, SCERT, Kevirale-u Kerhuo-i ashitsü aser

Organizing Committee convenor Vipopal Kintso-i tarur pela agizükba o jembitsü.

October 6 nü iba sentong tembangba nung alaketa jaoker MLA Dr. Tseilhoutuo Rhutso alitsü.

Iba Spelling Bee Championship nung 'pronouncers' ya Naroti Jamir, Sekholu Tetseo, Meliwe-u Elah, Mechuni Iralu aser Susan Angami nungertem alitsü aser tetendanger tem ya Kekhrieneinuo Sekhose, Lipoknukshi Jamir aser Emma Thonger alitsü. Manen Jury Board nung Vipopal Kintso,

Medo Yhokha aser Neizokhotuo Belho nungrttem alitsü.

Iba Spelling Bee Championship nung 'partners' tem ya The Morung Express, Excellogics Tech Solutions, Crystal Cables aser Mirrorless Films alitsü.

Senpet telemsa, Champion nem sen 80,000, 1st Runners Up nem sen 60,000, 2nd Runners Up nem sen 40,000 aser 3rd Runners Up nem sen 20,000 agütsütsü.

Quarter finalists shia nem sen 10,000 agütsütsü aser Young Speller nem sen 10,000 agütsütsü.

Kohima nung Northeast Youth Leaders senden amentsü

Dimapur, Mongputeni/Oct. 04 (TYO): National Foundation for India (NFI) ajanga Capital Convention Centre, Kohima nung Northeast Youth Leaders Conclave sentong November 7-8, 2023 anogotem ayongzükba agitsü renema lir.

Iba sentong ya "Empowering Youth Leadership: Bridging Sustainable Development Goals (SDGs) and Inclusive Socio-Economic Development" omen nung ajemdaker alitsü.

Iba sentong nung shilem agitsü jangra alirtemi October 10, 2023 tashinung application agütsütettsü, ta sangdong ka ajanga ashi.

Iba sentong nung SDGs takok ngutsü asoshi takotet aser mongintem tsingta sensaksem akatsü, shisa lemsateptsü, Interactive case study session,

biosphere, society aser rongsenketzüng tsingta tesendaktep aroka bushiba, telok lemsar sensaksemba, workshop amala nung Northeastern state ti prong nungi Youth Leaders temi shilem agitsü.

Iba sentong nung nisung balala tsingta shisa lemsatepba, Comprehensive skill-building workshops aser tesendaktep tsütsü maongka angutsü.

Iba sentong asoshi aonung asem mejangtsü, chiyongtsü aser senzüsempongba asoshi senotsü agütsütsü aser iba den külemi literature aser materials angutsü.

Iba dak sendakba nung osang tali tejangja metettsü aser application agütsütsü asoshi NFI indang website <https://nfi.org.in/> leaving-no-one-behind nung angutsü, ta sangdong ajanga ashi.

Jubilee Memorial College nung Literary Day amung



Dimapur, Mongputeni/Oct. 04 (TYO): Jubilee Memorial College, Mokokchung ajanga "Ingenium" omen nung ajemdaker October 4, 2023 nü Aongza Ki, Mokokchung nung Literary Day munga liasü.

Iba sentong ya College nung küm shia amunger, kong kaketshir nem par sempet sayutsü sapang agütsür.

Iba sentong nung house pezü - House of Lannister, House of

Targaryen, House of Baratheon aser House of Starks lemsar tabo 12 nung toktepa liasü.

Parnoki Battle of Bands, JMC Song, Fairlytale rewritten, expressive writing, Advocacy Speech, CosPlay, Brushes and Strokes, SpellBee, Dance Off, Ikbana amala nung toktepa liasü.

Iba sentong ya Sendongjungla, Assistant Literary Secretary, JMC ajanga melepzüng o jembia tembang.

Angh-i Tsokum aser Yemshe benjong salem lemsatep

Dimapur, Mongputeni/Oct. 04 (TYO): Khamniungan nung adianu aser adianutsürtem Tsokum benjong amungba mapang salem lemsateper, ta Nagaland Angh, La Ganesan-i sangdong ka nung ashi.

Alu temoatsü nung arotsü aser kibong nung anema alitsü temoatsü jazüka iba Tsokum benjong ya amunger.

Iba benjongmung nung pei-i züsentetba/yanglutetba oset dangar den lemsatepba ya jangratemtsü yimya ka lir. Iba tebour tajung benjongmung ajanga ajak asoshi tesunep aser yimchiyimjung bener arutsü imla atar, ta Angh-i ashi.

Ano maneni Nagaland Angh, La

Ganesan-isa sangdong ka nung Pochury nung adianu aser adianutsürtem den Yemshe benjong salem lemsateper ta ashi.

Alu tasen aroba agizüktsü aser küm tepiyong anibelega inyakba nung temoatsü adenba nungtem nung iba Yemshe benjong ya amunger.

Iba benjongmung nung chiyongtsü aser sempet lemsatepa tesendaktem asendenshir.

Iba benjongmung ajanga tesunep, telongjem aser yimchiyimjung maneni asen den alitsü sarasademer. Tsüngremi Nagaland moajang, ta Nagaland Angh-isa kasa sangdong nung ashi.

MTLT ajanga asükhu lemsateper

Dimapur, Mongputeni/Oct. 04 (TYO): Chümoukedima nung October 4, 2023 nü gari lendong ka nung Achet Mollier asüba osang angashia kanga aoksar, ta Mokokchung Town Lanur Telongjem (MTLT) sangdong ka ajanga ashi.

Asür Achet Mollier ya Ao Kaketshir Mungdang nung Cultural Secretary aser Dimapur Ao Youth Organisation, Foothill Unit

nung Media Secretary inyaka liasü.

Pa ama tarutsü nukla tajung aliba lanur ka tajungdang asüba ya Naga nung aser talisa Aortem asoshi takoksa tulu lir.

Mangyimer kibong nem temolung nung tesunep aser tashi agüjang ta sarasademtsür. Asür tanüla teti tatem maka tesunep nung anisüngzükjangma, ta MTLT sangdong ajangasa ashi.

GOVERNMENT OF NAGALAND

DIRECTORATE OF INDUSTRIES & COMMERCE

e.mail:industry.naga@gmail.com, e-fax:-08468825666 www.industry.nagaland.gov.in

ADVERTISEMENT

Dated Kohima, the Oct. 2023

NO.IND/DEV/HORNBILL/314/03 (Vol-III): Interested Entrepreneurs those who are expert on Indigenous Local Produce are hereby invited for allotment of stall at the Exhibition cum Sale of Handloom & Handicraft Products.

- Bamboo Pavilion, Naga Heritage Village at Kisama during the Hornbill Festival from 1st to 10th December 2023.
- India International Trade Fair (IITF) at Pragati Maidan, New Delhi from 14th to 27th November 2023. Stall will be allotted to the selected entrepreneurs by the Selection Committee of the Department. Application in plain paper alongwith sample with detailed items to be displayed/exhibited/ proper authentic address and contact number be submitted to the Directorate of Industries & Commerce (Room No-34, First-Floor, Development Branch), Kohima on or before 20th October 2023. All the sample items will be screened by the Committee for all the participants and the selected participants should strictly adhere to display the items produce by them. Selected participants those who display readymade items/products will not be allowed to participant in the Exhibition. No applications will be entertained after the last date of submission.

(A. Temjen Jamir)

Director of Industries & Commerce.

Rajasthan nung voters crore 5.26 jungogo: EC

New Delhi, October 04 (Agencies): Rajasthan nung voters crore 5.26 jungogo aser iba nungjagi voters crore 2.51 bo tetsürtem lir, ta Bodhbarnü state election department-i metetdaksü.

Osangbenertem den jembidang Chief Electoral Officer, Praveen Gupta-i, Rajasthan nung voters lakh 6.96 bendenlokogo, ta metetdaksü.

Gupta-i, revision program kübok arrshi küm 80 ser temapur voters lakh 11.78 lir aser arrshi küm 100 ser temapur voters lakh 17,241 lir, ta metetdaksü.

Specially qualified voters lakh 5.61 lir aser Election Commission of India-i voters list nung register asüba item voters-

i election mapang nung pei kidang nungi postal ballot ajanga vote agütsütsü akok, ta Gupta-isa metetdaksü.

Joko kobi melii Rajasthan nung assembly election agütsü. Iba election nung BJP aser Congress na kanga atongtepa tokteptsü, ta tawa Times Now Navbharat ETG Opinion Poll survey ajanga bushitetogo.

Menden 200 aliba Rajasthan assembly nung tang Congress MLA 100 lir aser Chief Minister teinyakdakji Congress lenir Ashok Gehlot lir.

Iba election nung BJP-i menden 95-105 shi angütsü, Congress-i menden 91-101 angütsü aser tanga party temi menden 3-6 shi angütsü, ta parnoki asandangtet.



October 04, 2023 nü National Media Centre, New Delhi nung Information & Broadcasting Union Minister, Anurag Thakur-i osangbenertem den jembidang tangokba noksa nung angur. Union Minister-i Union cabinet-i agiba telemtetbatem metetdakja liasü.

Enforcement Directorate-i AAP MP, Sanjay Singh puogo

New Delhi, October 04 (Agencies): Bodhbarnü Delhi Excise policy ochimashi ken o dak sendakba nung Enforcement Directorate-i Aam Aadmi Party (AAP) Rajya Sabha MP, Sanjay Singh'er ki mita aoba sülen pa puogo.

Iba ken o dak sendakba nung ED ketdangsertemi Sanjay Singh dang ghonda 10 dak tema asüngdangyaa liasü.

Enforcement Directorate-i iba ken o dak sendakba charge sheet nung Sanjay Singh tenüng züngoka lir. Dinesh Arora-i party ka nung pai Sanjay Singh ajuru, ta metetdakja liasü.

Delhi Chief Minister aser AAP tongti lenir, Arvind Kejriwal-i ED ketdangsertemi par party MP, Singh'er ki mita repringba atema BJP aitsü.

Arvind Kejriwal-i, BJP-i 2024 küm Lok Sabha election nung tamakok angütsü aliba ajanga parnoki yamai inyaker, ta aitsü.

Delhi Education Minister, Atishi-ia X ajanga, "BJP-i INDIA teloktep matsüngdang tamakok angütsüji tejangja. Manish aser Satyendra na apuba sülen sorkari Sanjay-a puogo. Asenokia asen party office nung ED office ka melapoktsü masü no? BJP-i AAP anema tiyazü nung tai tongloktsüba ajanga dang taküm litettsü ama repringteter," ta metetdaksü

Taküm March ita nunga Delhi excise policy ken o nung ED-i taoba mapang Delhi Deputy Chief Minister aser AAP lenir Manish Sisodia pua liasü.

AAP MP apuba dak sendakba nung Nationalist Congress Party Tir, Sharad Pawar-i, "Iba ya mangayangba lir aser Kejriwal anema inyakba lir," ta aitsü.

Delhi Congress Tir, Arvinder S Lovely-i, "Congress-i ochimashi mapatem pu-masemer aser excise policy ochimashi nung aibelenertem aputsüla. Nisung kari danga shilem agia lira nisungbaji aputsüla. Ajisüaka bushisüngdangba nung amalitep masüba nung ajemdaker nisung ka pura ibajibito tim masüba nung agencies amshiba lir. Yimtenren tebilemba ataloktsü atema bushisüngdangba agencies amshitsü makok," ta metetdaksü.

Ano BJP MP, Manoj Tiwari-ibo, "Parnoki shidi züluba yimba ajangabo parnok ochishirtem ama sayur. Excise policy nung Sanjay Singh apuba ajanga, iba milak ya Sanjay Singh mesüra Manish Sisodia mesüra Satyendar Jain nung madak dang masü ta sayur. Tongtiji Arvind Kejriwal asütsüa akok aser iba milak ajanga pa-atongtsü," ta ashi.

Linük nung Backward Classes indang census agütsüla: Kharage



October 04, 2023 nü Raigarh nung Congress Tir, Mallikarjun Kharage, Chhattisgarh Chief Minister Bhupesh Baghel, Deputy Chief Minister T. S. Singh Deo, AICC State Incharge Kumari Selja, State Congress Tir Deepak Bajj aser tangartem 'Bharose Ka Sammelan' nung adenba noksa nung angur.

New Delhi, Mongputeni/October 04 (Agencies): Bodhbarnü Congress Tir, Mallikarjun Kharage-i, Congress-i linük nung backward classes indang census agidaksüner, kechiyong ibaji ajanga parnok jenjang junga angateta parnok terenlok atema inyaksü, ta ashi.

Congress-i linük nung telemsa adokdaksütsü atema inyaker, ta Ato kilonser Narendra Modi-i Congress aitsüba dak sendakba nung Kharage-i, 2024 küm pa asaya malitsü, keching linük nüburtemi angatetadokogo, ta ashi.

Raigarh district nung Chhattisgarh Congress sorkari ayongzüka 'Bharose ka Sammelan' sentong nung jembidang Kharage-i, BJP aser RSS dak 'tetsürtem anemba' tangatetba lir, ta ashi.

BJP-i tetsürtem, backward classes aser sensakertem atema bilemetsüra parnoki women's reservation ozüng

tangsa benoka inyaksüla, ta pai ashi.

"Congress-i women's reservation bill anema liasü, ta parnoki (BJP) jembir. Shirnoki linük temzüng nung temelenshi bener aru aser panchayati nung tetsürtem reservation atema inyak? Itemji Congress-i inyak," ta pai ashi.

"Jan Sangh süaka, BJP mesüra RSS süaka parnok tangatetbaji "tetsürtem anema lir". Parnoki tetsürtem jenjang majungkettsüner," ta Kharage-i ashi.

"Parnoki tetsürtem, backward classes aser sensakertem atema bilemetsüra parnoki tangsa women's reservation mapa küma benoktsüla. Ajisüaka iba ozüng ya 2034 küm tashi nung mebenoktsü," ta Congress Tirisa metetdaksü.

"Ano tanga kaji OBC (Other Backward Classes) census lir. Onoki backward classes indang census agidaksüner, kechiyong

ibaji ajanga nisung kwi backward class nung lir, azüng-zülü mashir kwi ali aser shirnok rongsenkettsüng tsütsü tesülen atsüngzüka lilar metettsü. Iba census agiba ajanga osang tejangja metettsü aser ibaji ajanga parnok libaliro jenjang ajungkettsütsü atema asalentong yanglua inyakba nung yaritsü," ta Kharage-i ashi.

"Item ajak atemaji onoki backward classes aser sensakertem census agütsü akhanger. Ajisüaka Modi sahab-i, opposition-i linük nung telemsa adokdaksüner aser tetsürtem temeden rakzükner ta aitsür. Modi, tangbo nüburtemi meteta kümogo aser nü asaya mapang talangka malitsü," ta paisa ashi.

Mongolbarnü Chhattisgarh nung lokti senden ka nung Modi-i, Congress-i caste agütsü akhangba atema aitsüba den külemi, Congress-i linük raksatsütsü atema Hindu nung tsüngda telemsa adokdaksütsü meranger, ta aija liasü.

Kulgam district nung Hizbul Mujahideen kiralongrar ana khaset

Srinagar, Mongputeni/October 04 (Agencies): Bodhbarnü Jammu & Kashmir kübok Kulgam district nung security sepaitem aser kiralongrartem tsüngda khatepdang kiralongrar ana khasetogo, ta police-i metetdaksü.

Kashmir Zone Police-i X ajanga, ketdangsertemi raraba tesem nungjagi kiralongrar ana tasü mangji bener aruogo, ta metetdaksü.

South Kashmir district kübok Kujjar area nung sepai aser kiralongrartem tsüngda rara tenzüka liasü; tang tashi kiralongrartem mita odar, ta kasa osang ajanga metetdaksü.

Kiralongrar anaji ka Frisal nungi Basit Amin Bhat aser ka Hawoora nungi Saqib Ahmad Lone lir ta jangjaogo; tenaprong Hizbul Mujahideen telok den tesendaktep lir.

Tanü (Bodhbar) agi

asemnübuba Rajouri district kübok Kalakote arem nung kiralongrartem mita odar. Hombarnü kiralongrartem den raradang sepai ana yiruba sülen nungi tang tashi iba arem nung kiralongrartem mita odar.

Kiralongrartem aliba osang lazükba sülen Army aser Jammu & Kashmir Police senpeter Kalakote kübok Broh aser Soom arem nung kiralongrartem mita aoba operation tenzüka liasü.



Kolkata, October 04, 2023: Mongolbarnü New Delhi nung Trinamool Congress National General Secretary Abhishekh Banerjee den TMC lenirtem anema Delhi police-i tashiyim amshiba anema Bodhbarnü Krishi Bhavan, Kolkata nung Trinamool Congress Chhatra Parishad (students wing)-i longkak aйдang tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, MONGPUTENI (OCTOBER) 05, 2023

Nisungi azü meyangluteter

Nisungi nisung melen alima nung dang masü saka ita petinu nunga tuagi mapa inyaktsü asoshi tokolok shisatsü keta lia o dena jembitettsüsa ' Artificial Intelligent' lia 'robot' yanglur yokteter. Aji Oda, nisungtemi yanglutetba mapatem nung nisungtemi süngmangtsüsa tanü alima nung purapiteta yanglutetba aser tatalokba aika lir. Ajisüaka, nisungtemi purapiteta yanglutetba tesüngmangtsü mapatem dang nungi ano nisungi meyanglutetba tesüngmangtsü mapa ka lir, aji tang tashi nisungi azü meyanglutetba ya asütsü. Azü ya taküm, kechiyong temang nung azü melira temang shilem kata taküm alitsü makok. Ibayongji, nisung taküm kümzüksü asoshi azü tenla agütsütsüba ya kanga tongtibang mapa ka kümogo. Atangji, tashidak tapu balala agi shirangertem asoshi teti azü nungdaker, anungji tangatettertemi temeim agi kecha nunnganga melii azü tenla agütsür, kechiyong azü melena tanga ka agi nisung taküm alitsüsa kecha yanglutetba maka. Ano, talisa tang ama dengue wara agi nisungtemi mozü kidanga yipten agi mata shirangtepdangsa azü ya tenüngdakba nungdaker, anungji doctor-temi dang nungibo ano azü tenlartemang tenüngdakba akümer. Iba ama tensa tia ka nung Dimapur nung Aor lanurtemi mulungsua azü tenla agütsüba sentong ayongzükba yagi nisungtemi aika tasü lendong nungi kümzüksü. Azü tenla agütsüba nung tajung aser tepelatsü kaji aseni azü tenla agütsüba jagi asen nisung mesüra asen kinunger dang masü saka asenoki memetetba nisung takümang ka kümzüksüsa akok. Atangji, azü ya temang nungi agizüker blood bank nung asüyonga talangka meyteter, anungji rongdak nungdaker nung azü tasen aser tajung angutsü atema azü tenla agütsürtem tenüngang azü ayudak ketdangsertemi bendena ayur. Ano, temulunger lokti tentet Dimapur Ao Lanur Telongjem ama telokia azü tenla agütsünertem tenüng aser tongtepratepdak bendena ayur. Azü tenla agütsütsüba yabo küm 18 nungi 60 tain purtem rongnung anema alirtem ajaki agütsütettsü. Aikati pei temang nungi azü tuzüka agütsütsü tsübur, kechiyong azü tuzükba jagi azü ajemer aser temang tashimait akümtsü amai bilemer. Ajisüaka, aji tai bilemer, kechiyong nisung temang nungi azü tenla agütsütsü asoshi tuzük dang azü aika masü saka unit ka, aji milliliters 450 dang tuzüker. Asen temang nung azü iba shikajibo anogo shia parnoksa azü tasen agi melener, anungji azü tenla agütsüba ajanga tajangzük dang ashi takoksa mangur. Aji oda, azü tenla agütsütsü purtem nungi azü metuzük dang parnok temang nung tashidak ali mali aser azü peria ali mali tendangmar, anungji azü tenla agütsü dang asen temang jenjanga meteter. Anungji, azü tenlatsü yabo nisung ajaki mulungsua tenlatsüla. Ashiko, asüngbo asenang azü nungdaksüa akok, idangji aseni tangar nem tenla agütsüba amato asena tangar nungi azü tenla nungdaksü. Nisung zü yabo mayoker, ajisüaka ozüng alema azü yoka chiyongertema karbo ajurutsüa akok, ajisüaka item züjibo tajung masütsüa akok, anungji angati azü tenla agütsüba züjisa tajungba asütsü. Ano, azü tuzük dang amshiba ajem aser oset ajakji tasen dang amshir, anungji tangar nungi tashidak menatsüa lenmang mali. Temang nung azü yabo parnoksa melenpet melener asünungji, anema aliba nisung kati ita asem nung khen azü tenla agütsütettsü akok. Ibayongji nisung karibo azü tenla ya noklang junga agütsür. Aji oda, asenoki tangar asoshi azü tenla agütsüba yagi temulung nung tetsübu masü tepela angur. Atangji, tanülabo Tsüngremiang kümzük tet saka asenokia asen zü tenlaba ajanga kar temangbo kümzük tettsü.

OLEMSABANG

"RISHIKANGSHI" ASER "METANGDANGI": Kaket züluri item tasüngdangba asüngdanga research agitsü nungdaker

~ Wati Longchar

YSS nung züngsem tajung kari "philosophical/theological hermeneutic aser historiography" nung shisa dokten ka akatsü nungdakba indang shisemogo. Aji kanga tongtibang. Molungkimong aser Molungyimsen ana arogo suiren (otsü)(Menjibai history dang "Süiren" ta agütsüogo)sentakba nung ojang ana "Rishikangshi" aser "Metangdangi"ta asüba ya kanga tongtibang sua jemi nung iba ojang ana ratet sentakba nung methodological question kar asüngdanga research agi nung ajungdisu ta sensaksemtsü onük benoka YSS nung züngsempur aikati shilem agiogo. Shilem agir ajak dang kanga pelar.

Item methodological question ya iba ocet tephong kümtsüri puratetba tasüngdangbatem tasen masü. Shirnok Master aser Doctoral level nung hermeneutics subject agiogo, parnoki question aika asüngdanga research zülur. Tasüngdangba aika asüngdanga suiren atalokba ochibaji tangatettsü atema question aika asüngdanga kaket zülur. Anungji iba ocet tephong kümtsüri telangzüba magütsür, saka tali aroka bushiloktsü atema question asüngdanga dang aser item questiontem ajanga research tarokba agitsü leman ngutettsü sudi ta bilema iba onük lemsateper.

Sendaksem mapang tebilemba lemsatepdang, iba ocet kari taoba atalokba suiren angatettsü asoshi "methodological framework" tejangja tuyurta shia liasü. Taoba mapang suiren aika temesung nung ajungketa, Tsüngrem nisung amai zülua lir. Tanu putu taoba mapang atalokba "receivers", "colonized" tsütsü nungi suiren meyipa repringshitsüla ta lemsatep. Tat. agi, Mary Mead-i züluba "A Corner in India" ya fundraising atema züluba kaket ka ta F.S. Down-i ashir. Anungji Naga nung tamang lima amai nemja züluba angutsü. F.S. Down-i pai züluba kaket, "The Mighty Works of God" ya colonial, white is superior ta angatetba tsütsü nungi zülü anungji nia kü methodological framework magizük teteter ta pai pa sasa aija shiba angur. Anungji missionary record ajakji iba tsütsü nungi angatettsüla aser suirenji zülushitsü nungdak ta lemsatepa liasü. Saka karibo temesung nungjeri Tsüngrem amai angateta, parnoki zülubaji tajento kata tai maliama parnoki zülua aliba record lemsatepa liasü. Parnoki iba ocet nükjidong "methodological framework" ka agütsütsü züluba mejangjaba agi yamaji lemsa alitsü ta bilemogo. Methodological question metettsü atema YSS nung sensaksemba "Rishikangshi" aser "Metangdangi" ta jembiba ojang ana ya lemsateper.

"Rishikangshi" ta asüba ya kechi?Shibai/shirnoki kodang nungi kechi atema amshi? Rishikangshi ta asüba ya Clark aser Mary Mead nati koma angatet, aser koma zülua lir? Kechi nükjidong nung zülü? Rishikangshiji shirnoki asü? Kechiba? Shibasa aser koma rishikangshi? Taküm küli kar lir asü? Aori rishikangshi ta asüba ya kodang nungi, komala ka maparen dang rishikangshi ta aja. Missionary and Aor tangatetba balala asü kesadang asü? Godhula aser Clarka rishikangshi asü masü? Yim tasen akümtsübaji shibai/shirnoki atongtet? Molungkimong nungeri asü mesura Clarki? Godhulai?Yim tasen akümbaji rishikangshi marem akümba asü, yimsusuba menden raktepba agi? Clarkiyim tasenji anir akümba asü? Tamanger dang rishikangshi asü? mamangera rishikangshi? Clark tamanger den anitak ao asü, pai anir ao? Clark or tebuttsü Mary Mead-i dang rishikangshi ojang ya zülua lir asü, tanga misssionarytemiamesura Godhulaia zülua lir? Koma zülua lir? Missionary report nung "rishikangshi" ta asüba ya kechiba amshi? Baptist missionary report balala nunga iba ojang ya amshia lir asü masü?Koma amshia lir? Kechi nükjidong nung amshi? Iba mesaukba aika asüngdangtsü akok.

"Metangdangi" ta asüba ya kodang nungi amshia tenzük? Clarki koba mapang, kong, koma amshia ali? Kechi, kobala mapa/inyakyim metangdanga indang jembir? Clarki kowiben amshia lir? Ya 1986 Special Report nung "metangdangi arubaji ta **angateter**" ta opinion ka agütsüba dak ajemdaker Molungkimong or Molyngyimsen nung aser par phukümeri puraloka jembia aoba asü? "Metangdangi" ta amshiba ya tambu-tanubu jangjatsüba atema amshiba ojang ka asü? Clarki amshia ali nunga pai koba context nung kechi atema amshi? Clarki amshia melira, kechiba interpretation opinion ka nung ammeter yamai arogo suiren sentakba nung jembir? Court-i aotsüsa aküm?Sura, "opinion" ka nung ajemdaker okadaki ABAM ajar asü?

Anungji "Rishikangshi aser Metangdangi" ta asüba ojang ana ya missionarytemi kowiben report agüja lir jangjatsüla.Kobala jenjang ka nuburtem alidang reportji zülü? Kechi nükjidong nung zülü? Tezülur mulung nung kechi bilema zülur alitsü? Missionary record nung "Disband" ta asüba ojang yaa kesa tasüngdangbatemji asüngdangtsü nungdak aser Rishikangshi aser Metangdangi ta jembiba ojang ana ya "disband"ojang tesendaktepji koma angateta benshia aru aji metettsüla. Tanu Molungkimong o Molungyimsen arogo suiren sentakba nung parnokia kechi ashir? Kaket zülurtemi iba ojang ana ya koda rateter aser amshir? Item ajakji prime source (primary source and prime source anaji balala) den medemdanga research agitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bear Grylls-i Yordan ayong nung Yisu baptiba tesem nung baptiogo



Bear Grylls Yordan ayong nung baptitsü lia tangokba noksa nung angur.

October 04, 2023: Kaketzülur, Bear Grylls-i Yordan ayong nung Yisu Khrista baptiba kasa tesem nung baptinüa aliba ama atangji iba tesem nung baptiogo.

Hombarnü (October 2, 2023) Grylls-i social media ajanga pa Yordan ayong nung baptitsü lia tangokba noksa ka lemsatep.

Bear Grylls-i X ajanga, "Ni sapuba Yohan Baptibai Yisu baptitsüba kasa tzü nung baptitsü atema ni mapang talangka nungi tejangraba liasü. Iba otsü ya tesümgangtsü. Yisu aoba ajaklen temelenshi liasü, taküm tasen liasü aser mangdang tasen liasü. Luk-i Yisu majurudang pa ya Syria nunger doctor ka liasü. Pai (Luk) pa taküm otsü indang kanga junga zülur aser tejashitsüka zülur. Otsüji tatsü. Ni meimer," ta lemsatep.

Yisu Khrista baptiba otsü ta Tasen Lai nung osangtajung

kakettem- Mathi, Mark, Luk aser Yohan kakettem nung shia lir.

Luk 3:21-22 nung yamai shia lir, "Tang ya adok, kodang nisung ajak baptitsü. Yisu-a baptir külen sarasadem. Aser anüing lapoka, temang nung posü ama Tanela Temeshi alua Pa dak Atem. Aser anüing nungi ola ka adoka ashi, Na Kü meimba Chir, Nü dak Ni temelung kanga achir."

Bear Grylls-i "Man vs. Wild" show nung shilem agiba ajanga pa kanga nungtugu aküm. Pai mapang ajak nung Khristan tamang indang lemsateper.

Taküm küm tetenzüklen interview ka nung jembidang pai, Yisu sülen anidakba aser tazüngla yimsü na tsüngda tebandang metetdakja liasü.

Iba mapang nungji pai, "Tanü-asüing Arogo 99 bo Yisui magizüksü sudi, ta ni bilemer. Taküm nung asen teinyaktsü mapaji yimsü toktsür Yisu den

anasa alitsüla. Nüngdakra Arogo-a tokjang, kechiyong nisung balala atema iba (Arogo) tetezü balala aika lir," ta jembia liasü.

"Arogo den-a sendaktepang, kechiyong ibaji tamangertem aser medemertem longjemba, ochi, tamang aser temeim indang lir. Ajisüaka shilem balala agiba, tekülem aser tetushi teloktem aser yamala aika Yisui magizüksüa akok ta ni bilemer," ta pai lemsatepa liasü.

Bear Grylls-isa tanga shows aika nung shilem agiogo; item rongnung "Escape from Hell," "The Island," aser "Running Wild with Bear Grylls" densema lir.

Grylls-i züluba kakettem rongnung "Soul Fuel: A Daily Devotional," "Never Give Up: My Life in the Wild," aser "Mind Fuel: Simple Ways to Build Mental Resilience Every Day" lir.

Kerala nung Christian Conference of Asia senden ayonga agi

Kottayam, October 04, 2023 (Agencies): Christian Conference of Asia 15buba lokti senden Kerala kübok Kottayam nung ayongzüka agiogo; iba senden ya küm pongu shia khen agir.

Taküm iba senden omenji "God, Renew Us in Your Spirit, and Restore the Creation" lir.

India nung tesüsabuba iba senden ayongzüka agibaji 1981 küm Bangalore nung liasü.

Kerala kübok Kottayam ya Khristan puti otsü nung kanga tongtibang tesem ka lir, kechiyong Yisu nütsüng Toma atema India nung iba yimti ya tiyongtsü tesem ka liasü.

52 CE nung Toma-i Kerala nung Arogotem tenzüka liasü.

1816 küm nungi tenzüka Church Mission Society-i Kottayam nung missionary mapatem tenzüka aser sensakertem atema shisaliok ajungketja liasü.

Christian Conference of Asia senden nung o lemteper sentongtem agi, talisa theology,

loktiliba aser yimtenren onüktem nung o lemteper.

Onük 15 atema shimba lenirtemi onük balala nung o lemteper; item onük rongnung lenisüba, Climate Change aser lisopur tebilemstü onüktem densema liasü.

Kasa senden nung CCA lenirtem tasen shim; Moderator ka, Vice Moderator ka, Treasurer ka aser Executive Committee nung züngsem 17 shim.

CCA tetenzük sentong nung World Council of Churches (WCC) General Secretary, Rev. Prof. Dr. Jerry Pillay-i okila jembia liasü.

Okila jembidang Dr. Pillay-i alima nung tebilemstü onük balala lemsatep aser item tebilemstü atema lenla balala nungi inyaktsü ayongzüka.

Paisa, yimtenren aser loktiliba tsütsü tebilemstü onüktem aser alima nung taküm amokmerenba tebilemstü atema lenla ajak nungi inyaktsü nungdak, ta ashi.

Pillay-isa, alima tatsükba akümba tebilemstü atema Arogo teinyaktsü shilem lir, ta ashi.

Dr. Pillay-i Vijayapuram Diocese Conference Centre nung ayongzüka Asian Ecumenical Youth Assembly nung shilem agi lenir 100 ajuruogo.

Pillay-i September 26 nungi October 3 tashi India semdangba mapang Asian Ecumenical Festival nung aden aser Kottayam nung aliba CSI Tenla kidang Tsüngrem O jembiba den külemi South Korea nungi Khristan lenirtem telok ka ajuruogo.

Pillay-isa Mar Thoma Theological Seminary, Kottayam; Malankara Syrian Orthodox Theological Seminary, Asian Ecumenical Institute, Thomas Mar Athanasius Memorial Research & Orientation Centre aser Orthodox Theological Seminary semdangogo.

ANOGO ABEN TSÜNGREM DEN

Shidakba temeshi

"O Kibubaji temeshi sobutsü sobur külemang" (t.9). Tsüngremi Pa nübur temeshi sūdaksüner. Tejen Lai ibai leshia aiben amshi. Aser tenyar Peteri pa shiti nung zulu (1Peter 1:16). Iba tetezü pilar, mejaja aser tejangja aliba.


Tebu Tsüngrem, Techir Tsüngrem aser Tanela Temeshi asenok taküm temeshi lidaktsütsü asoshi külemi mapa inyaker. Asenok temeshi lidaktsütsü asoshi asen menen atema Yisu Kangki nung asü. Asenok dak Tanela Temeshi lia Pa ain agi asenok temeshi alitsü ajungshir. Tsüngrem O i asenok temeshiba nung aintsü asoshi yarir. Yisui Tebu dang ashi, "Ne ochi agi parnok meshitetjang; Ne O ochi lir" (Yn. 17:17).

Shidakba temeshiji tebur tajung lir; tiyazü temeshibaji tebur majung. Farisee temeshibaji tiyazü temeshi- pei sasa yangluba temeshi. Shidakba temeshiji Yisu, aser Pai nisung pua aru. Fariseetemi parnokji maginü. Tanela tejangtemji- temeim, tepela, yimjung, taremsük aser tesünep- taküm tobur jungdaktsür.

Shidakba temeshibaji tobur tajung, aser iba tobur tajungji tekülem nungi adoker. Nai shiba külemer pa mesüka na akümer ta nai metetter ma? Ne Tsüngremji merumeruba Tsüngrem süra na merumerua akümtsü. Ne Tsüngremji tobur mejungra naa tebur majungtsü. Shibai sen külemer paji tekuru asütsü. Shibai jangratema külemer, paji tanük asütsü. Saka shibai ochi aser taküm aliba Tsüngrem külemer pa/la ji tobur tajung asütsü-tali, tali Yisu mesüka akümtsü.

Na temeshi taküm alitsü asoshi Tsüngremi ne nem nungdak ajak agütsür. Pa o i na sayudakjang aser Tanela Temeshii na anidakjang. Na Yisu mesüka akümtsüsa liang.

'The Blind' film repranger aika bapti



October 04, 2023: Khristan film "The Blind" ajanga Hollywood nung Top 4 jenjang tongtetba dang masü saka iba film repranger aikati Khrista nem taküm bendanga agüja bapti.

Iba film ya Phil aser Kay Robertson na indang otsü lir.

The Blind ajanga dollar sen million 5.1 aazüka tang jenjang 4buba nung lir. Hollywood nung PAW Patrol: The Mighty Movie ajanga sen million 22.7, Saw X ajanga sen million 18.3 aser The Creator ajanga sen million 14 aazükteta lir.

The Blind film ya theater 1,715 nung saya aser tanga film asemjibo iba dang nungjagi theater teimba nung sayaogo.

Phil aser Kay Robertson na kiyimba sülen Phil-i yi indoktsü

merangba den külemi ain adokba yimya indoktsü meranger, iba sülen pai Khrista ajurur.

Film producer rongnung ka, Zach Dasher-i, "Ni hopta tatembanglen jepa dang liasü. Tsüngremi mapa tulu inyaker," ta ashi.

University of Mount Olive (N.C.) indang campus nunga kaketshirtem dang iba film sayua liasü. Hwy 55 CEO, Kenny Moore aser pa kinüngtsü, Karen na teyari ajanga campus nung iba film saya.

2020 küm Phil Robertson-i Kenny Moore baptija liasü.

University campus nung iba film reprangba sülen kaketshir 11-i Khrista agizük aser kaketshir 30-i baptitsü telemtetba agia baptiogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Sangnen

(v) arr aser yong amshia inyakba yongsen mapa (bamboo & cane rope craft)

* Yimtsüng shia nung sangnen mapa inyakdak lapok nung ajungtsü.

Sangoktsü

(v) ayimoktsü, metetdaksü (proclaim)

* Tenyartemi Yisu asoba osang sangoktsü.

OLONG PAITEP # 6657

1				2				3		4
5		6								
							7			
8										
										9
		10					11			
				12				13		
14										
							15			
16										

TIPLIN

- 2. Auonungchiyongsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüung
- 3. Tenarong maten
- 4. A _ _ _ g
- 6. Mopung apodoka
- ola adokdaksüba
- 9. Tonglipang tagitsü
- 10. Menungra bilem
- 11. Aiür
- 13. S _ _ _ k
- 14. T _ _ _ r

OLONG PAITEP # 6656 TELANGZÜBA

TIPLIN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

Sikkim tzümetsüng ajanga district 4 nung school ajak shibanger

Gangtok, October 4, 2023

(Agencies): Sikkim education department-i district pezü nung nija aser sorkar school tem shibangtsü osang metetdaksüogo.

Pakyong, Gangtok, Namchi aser Mangan district tem nung October 8 tashi school ajak shibangtsü.

"Teesta ayong ajanga tzümetsüng timtem bentsür aruba ajanga district 4 nung October 8, 2023 tashi school ajak shibangtsü" ta Sikkim education department-i sangdong ka nung metetdaksü.

Lonark Lake nung ajungben tzümetsüng lendong nung nisung 4 asüba osang angazüker.

Sikkim nung tzunglu kanga aruba ajanga Indian Army personnel 23 tashi samar bushitepdar. Sepai 23 ya Bardang anasa sama ta osang angazüker.

Sikkim chief minister PS Tamang-Golay-ia Singtam tonga ao aser idakji osangtsüsang metetpelatep.

"Alima lendong atalokba osang onoki angashiogo. Timtem ajuruba tesem ajak nung emergency services tenzükogo. Ni Singtam semdangogo aser teraksa anguba reprangdangogo" ta Sikkim CM PS Golay-ia ashi.

Gorkha Janmukti Morcha president Bimal Gurung-i PM Modi dangi shidi ka nung Kalimpong aser Darjeeling district tem nung Teesta ayong ajanga tzümetsüng timtem ajuruba osang lemsatepogo.

"North Sikkim nung aliba Lhonak Lake anenzükba ajanga Teesta ayong nung tzü mesemi ayimer. Iba ajanga teraksa jenti anguba den meimchir takümtem samaogo. Mapang shitak nung mapa meinyakra tensa tamajungba akümtsü akok" ta Gurung-i PM Modi dang ashi.

Siliguri ajanga Kalimpong district aser Darjeeling district den sendaktepba National Highway 10 nung tesem aika anenzüka ogo aser garitem mesenzüteter, ta paisa ashi.

Gurung-isa PM Modi dang teinyaktsü mapatem inyaktsü ayongzükogo.

Bodbarñü Prime Minister Narendra Modi-i Sikkim Chief Minister Prem Singh Tamang den jembiogo aser osang metetpelaogo.

"Sikkim CM PS Tamang Golay den jembiogo. Akokba tashi teyari agütsütsü nangzükogo. Timtem ajururtem kümzüka ayutsü atema ni sarasademtsür" ta PM Modi-i metetdaksü.

Iba lendong nung Army 23 tashi samar bushiteper aser gari 41 tashi tzü agi mobang.

Mongulbar aonung tesü awatsüng anenzükba ajanga tzümetsüng lendong balala nung asür tasümgang 5 ngutetogo.

"Onoki nisung kwika sama ano mejangjateter. Onoki osangtem bendener. Tang tashi nung nisung 7 samaba osang jangjaogo" ta Sikkim State Disaster Management Authority director Prabhakar Rai-ia ashi.

Mizoram election 2023 atema MNF-i candidates metetdaksür

Gangtok, October 4, 2023

(Agencies): 2023 küm tatemlen Mizoram Assembly election agitsü sentong lir aser iba atema Mizo National Front (MNF) Assembly menden 40 atema candidate tem metetdaksüogo.

Taküm assembly election atema candidate tem rongnung tetsür ana aser tejak tasen 15 dena lir. MNF-i assembly menden 40 prong nung tokteptsü.

Chief Minister aser MNF President Zoramthanga-i Aizawl East-I nungi tokteptsü. 2018

assembly elections nung pai iba menden nung takok angu. Ano Deputy Chief Minister Tawnluia-i Tuichang menden nungi tokteptsü.

Taruba election nung Home Minister Lalchamlia aser Assembly Speaker Lalrinliana Sailo nati shilem magitsü lemtetogo.

Power Minister R. Lalzirliana aser Tourism Minister Robert Romawia Royte nati constituency melenogo.

Aizawl nung sentong ka agidang candidate tem tenüung metetdaksü.

CM Zoramthanga-isa election campaign tenzük. Lalchamlia-ia lanu putu asoshi lenmang lapoktsür aser iba jagi election nung shilem magitsü ta ashi.

Taoba Minister Dr K. Beichhua-i party anema inyakba atema party nungi meindoka liasü. Pai Siaha constituency nungi BJP candidate ka ama tokteptsü imlar.

Assam police ketdangsür kati süpokrem meshidang apu

Guwahati, October 4, 2023

(Agencies): Assam nung Directorate of Vigilance and Anti-Corruption (DirVAC) ketdangsürtemi Lakhimpur district nung Sub-Inspector ka puogo.

October 4 nü apuba polcie ketdangsür ya Panigaon Police Station nungi Merafat

Ali ta jangjaogo.

Ali-i süpokrem meshia agidang apu. Nisung kati criminal case ka nung bail meshiba atema pai süpokrem meshi.

October 3 nü Hailakandi district nunga Directorate of Vigilance and Anti-Corruption (DirVAC)-i

Assistant Sub-Inspector kati süpokrem meshiba atema apu.

Iba nisung ya Abdullapur Police Patrol Post nungi Hitush Nath ta jangjaogo.

DirVAC-i Dutta apusü atema tasa ka atong aser pai nisung ka ket nungi Rs 10,000 süpokrem meshidang apu.

NAI-A YA METETTER MA

South Africa linük nungbo capital 3 tashi lir. Mezüngbuba administrative aser executive capitalji Pretoria, legislative capitalji Cape Town & judicial capitalji Bloemfontein ta tenüung jateta lir.

ATTENTION!

GOVERNMENT OF INDIA PROVIDES COMPENSATION TO THE VICTIMS OF HIT-AND-RUN MOTOR ACCIDENTS

₹ 2 LAKHS IN CASE OF DEATH (to legal representatives of deceased)

₹ 50,000 IN CASE OF GRIEVOUS HURT

SIMPLE & TIME BOUND PROCESS

For any queries, kindly contact:
Kohima : Kekhüsezo Zao | BC Incharge | +91 9402 679 209 | kekhüsezo.zao@nic.co.in
All other Districts : Z H Sema | Divisional Incharge | +91 9436 603 482 | zh.seka@nic.co.in

Courtesy: MOTOR VEHICLES DEPARTMENT NAGALAND, KOHIMA

Tunisia nung tir candidate Abir Moussi pua ayu



Abir Moussi

Tunis, Mongputeni/October 4 (Agencies): Tunusia police-i nungtungu opposition lenir Abir Moussi, presidential palace kima puogo. Moussi ya Tunisia indang public prosecutor-i Mongolbarnü apu, ta la okatsüri ashi.

"Moussi ya personal data process asüba, mapa inyaksü asoshi temeden agüja aliba minprongba aser mepetmesü adokdaksütsü atema inyaksangshiba atema ghonda 48 tashi sota ayu," ta

obendanger Aroussi Zgir-i ashi. Lar party indang Facebook page nung sangdong ka ajanga ashiba agi, Moussi indang phone-a meshia yuogo aser la police station-i meyok tsünga mejangjaba tesem kati anir oa liasü.

Iba tatalokba sülen Moussi pusemertem aika La Goulette police station kima adenshia la apuba atema parnok mepelaba lemsatepba den la chioksü takhangba agüja liasü. Police temi iba ki

meketbanga ayu aser kasa mapang nung la pusemertemi "No fear, no terror, Abeer, daughter of the people" ta ayimtena liasü, ta Al Arabiya-i ashi.

Mongolbarnü Moussi-i video ka ajanga ashiba agi, lai presidential decree ka anema temepeshiba ka benoktsü atema lai presidential registry semdanga liasü. Moussi-isa, taküm küm tatemlen agitsü aliba local election magi tsünga iba tenüngdakba jenjang agiba ajanga Administrative Court nung ken o ka benoktsü atema la nem temelaba agütsütsü, ta shisem.

Moussi indang official page ajanga, Presidency of the Republic indang Registry Office-i parliamentary election dak sendakba nung la temepeshiba magizükba sülen lai Carthage Palace kima mener longkak ait aser ibayongji la apu, ta metetdaksü.

(Maneni tapak 8 nung...)

Afghan refugee anema Pakistan-i tim masüba inyaker: Taliban

Kabul, Mongputeni/Oct. 04 (Agencies): Pakistan-i par linük nung ozüng alema arua aliba migrants tem aputsü sangdongba sülen refugee tem meindoktsü telemtetba agiba ya magizükter, ta Taliban-i Bodhbarnü ashi.

Taoba mapang Twitter ta ja aliba social media sapang X nung Taliban odongtar kati ashiba agi, refugee tem pei sasa molungteter linük yutsür mao tashi Pakistan-i aremzüka atatsüla.

Afghanistan nung million 1.7 shi densema refugee ajak linük nung meindoktsü, ta Pakistan indang interim government-i Mongolbarnü shia liasü.

Iba mera ya taruba ita nungi agitsü aser shinga daka balaka rangloker inyaker masü aser linük ajunga asoshi lir, ta Islamabad-i ashi.

"Afghan refugee anema Pakistan yimya khenyongi magizükter. Pakistan nungeri iba sentong junga asadangshitsüla. Pakistan security tebilemsü nung Afghan refugee maden. Parnoki molungsoa Pakistan yutsür mao tashi parnoki aremzüksüla," ta Taliban odongtar Zabihullah Mujahid-i ashi.

Ozüng alema Pakistan-i aitba migrant tem October ita tatem tashinung pei sasa pei linüki meyipa aotsüla, aji mesüra onoki puer meyipa yoktsü, ta Pakistan Interior Minister Sarfraz Bugti-i shia liasü.

Ozüng alema linük nung aita aliba migrant tem indang ki o jen aser rongsen aputsü sorkar sentong yanglua lir aser iba amala migrants tem aliba osang ketdangsur nem agütsüba asoshi sempet agütsütsü aser iba atema special phone line ka

amenoktsü ta pai ashi.

1979 küm nungi tenzüka Afghanistan nungi migrants million aika Pakistan nung jenoka lir. August 2021 nung Taliban-i sorkar atsüngdokba sülen Afghan refugee 100,000 dak tema Pakistan telungi aitogo ta asadanteta lir. Linük nung Afghan nung million 4.4 shi lir aser item rongnung million 1.7 shi tenüng zülüoka mali, ta Pakistan-i ashir.

Pakistan nung telungpur tebilemsü tali akumba mechi kidanger linük ana tsünga tesendaktep maneni tamajungba akumba mapang iba osang ya sangdonger. Taliban-i sorkar atsüngdokba sülen Pakistani Taliban, shirkok dang Tehrik-e-Taliban Pakistan (TTP) ta ajar, parnoki Pakistan security forces dak amakba tenüng agia arur.

Pakistani counter-terror police temi taoba hopta ana tsünga Afghan refugee 1,000 shi puogo aser parnok tesadang ka shi immigration documents lir, ta Islamabad nung aliba Taliban-i aniba Afghan mission ajanga X nung ashi.

Parnoki Pakistan dang iba ama inyakyim anentsü ajungshi aser iba yagi linük ana tsünga tesendaktep mejungi akumtsü, shia liasü.

MULUNG ACHIR



18.06.1950 - 30.09.2023

Ozü temeim tsürabur L. Tongpang Longchar (Chuchuyimlang) ajungbena September 30, 2023 anogo nung akümüli tempanger onok mangyim jashi tia nung timtema alidang, onok nungdakba maparen ajak nung yaritepba den külemi ano Dimapur nungi yimtak leper tashi akhüm tetushi tulu agüja arogo aser senso neburtem den tesem balala nungi temeimertem shirkokisa timtem tulu agia onok den pei akok temeim mapatem agi yaritepa shilem agiogo, nenok ajak dang ozüi kanga mulung chia pelaba mulungnen o ka yangi lemsateper.

Tsüngremi nenok temeim mapa tajung meyipa moajangma.

- Temeim Kinungertem.

ASÜKO MOLUNGNEN O



Tsüngrem lar C. Akang Aier (Mopungchuket), akümüli wadang temer Kibuba kidangi shilangba anogo (30/09/2023). Akumliir mangyimer den rongsen, shisatsü aser nungdakba inyakyim ajak nung teka amtepa yariteper ajak dangi pelaba molungnen O lemsateper. Tsüngremi nenok mapa tajung meyipa moajangma.

~ Kinungtsü, Chirnur aser Kinungertem.



OFFICE OF THE
AO SENDEN

"Nübur Asashi" (For the People)

04-10-2023

ASÜKU LEMSATEPER

Anü teroto nung ajungbena mepet süloka manga aküm medem shingai meimlaba mapang ajungben lendong nung Sp.Imnayachet Mollier, Social & Culture Secretary Ao Kaketshir Mungdang asüba osang angashia kanga aoksar aser nemjemseta bilemer. Teyakyak lenir Ao kaketshirtem anitsü asoshi shimteter inyaka aoba mapang ano Ao Kaketshir Mungdang maparen asoshi jajadang ajungben lendong nung taküm samaba asoshi kangasa sasasetar. Asür leniri toktsüba ongdang tulu aser takoksa ulura asütsü rataseta bilemer.

Asüri toktsüba Ao Kaketshir Mungdang, Tsürabur aser kinungertem ajak nem iba ama tejashi mapang nung tesünep agüjang ta Tsüngrem dang mepishitsür aser Ao Senden mendenti ajanga asüku lemsateper.

Sd/-
(Chubawati Longchar)
President

Sd/-
(Imtipokym)
Gen. Secretary

MOLUNGNEN O



Onoki teti meima aliba Nochet Pongener shirangba aser asüba mapang shirisa ozü den yaritepogo, nenok ajak dang kinunger temi pelaba lemsateper. Talisa arogo, lokti tentet, Dr. Simeon aser team (Faith Hospital Dimapur), IETC & SAMEITI staff, Guwahati High Court (Kohima Bench), tembartem, kinunger aser temolungertemi temeim sayuba aser yaritepba asoshi kangasa pelar. Nenok ajunga dang ozüi pelaba meshitetaka, Tulusang Tsüngremi nenok ajak molamoshia moatsütsü sarasademtsür.

"Kechiyong tanguba agi masü, saka tamang ajanga onoki jajar. Onok tasü ita dang alir, onoki iba ali temang nungi pilar Kibuba den kidang alitsü-ang onoki aginür." 2 Korint 5: 7-8

~ Temeim kinungertem.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA NOTIFICATION

NO.DTE/ESTT-2/02/2023-24/: Online applications are invited from North East (8 NE States) for admission to the different Undergraduate Programs in -

- 1) B. Pharm
- 2) B.Sc. Nursing
- 3) B. MLS
- 4) B. Optometry
- 5) B.Sc. RIT, under RIPANS, Mizoram for the academic session 2023-24.

Interested candidates may visit www.ripans.ac.in and apply for the same. Last date for online application submission is on 8th October, 2023.

Sd/-
(Er. VIPULHOU LHOUNGU)
Director

WCYO-i Nagaland Tug of War team agizük



October 3 nü Dimapur, Old NST Station tonga aruba sülen Nagaland team aser WCYO züngsem tem tangokba noksa nung angur.

Kohima, Mongputeni/October 4 (TYO): Western Chakhesang Youth Organization (WCYO)-i ayongzüka October 3 nü Old NST station Dimapur nung Nagaland Tug of War Association (NTWA) team agizükba sentong ka agiogo.

Tawang, Arunachal Pradesh nung September 29 nungi October 1 nü tashi asayaba 36buba Senior Men & Mixed Tug of War National Championship aser 18buba Senior Federation National Tug of War Championship 2023 nung Nagaland team-i silver medal ka ngua parnoki state

nem konang tetushi bener arutsüogo.

Nagaland Team Manager & Media Coordinator, Kuzhovesa Soho-i sangdong ka ajanga ashiba agi, NTWA tir Dr. Er. Vekho Swuro-i, Nagaland team nem tetushi agüja sentong tajung ayongzüksüba atema Association tenüng nung WCYO dang kanga pelaba lemsatepa liasü.

Nagaland team tang mezüngbuba iba asayamung nung shilem agia silver medal ka anguba ya Naga nungger atema otsüsüsü ka lir, ta paisa ashi.

Sarasadem ajanga aser ali rongsen den lenla balala ajanga

team nem teyari agütsüba atema Naga nungger ajak dang pelaba lemsatepa mapang Swuro-i, ajak longjemer inyakba ajanga iba takok tajung ya ngutetogo ta ashiba den tarutsü nunga maneni longjemer inyaksü yongya ataba shisema liasü.

Training shitak aser iba den asayatem atema coaching camp balala ayongzüka katsütsü tenangzüka agütsüba den taruba national Championship nungbo Nagaland team-i gold angutsü imlaba aser International jenjang nunga takok tajung angutsü imlaba paisa lemsatep.

Asian Games: Bains, Sable, Sunil, Lovlina aser Jyothi o Ojas nunggeri medal angu

Mongputeni/October 4, 2023 (Agencies): Hangzhou Asian Games tenzüker anogo 11buba nung India nungger asayartemi takok tajung nguogo. Bodhbarnü India tsür Harmilan Bains-i tetsür 800m event nung alizüng 2:03.75 nung tongteta silver medal ka nguogo.

Teburtem rongnungi 3000m steeplechase nung gold medal ka anguba sülen Avinash Sable-i ano tebur 5000m final nung silver medal ka ngua liasü. Pai 13:21.09 nung alizüng tongtet aser Bahrain nungger Dawit Fikadu Admasu ajateta tanabuba jenjang nung tembanga liasü. Iba asaya ya Bahrain nungger Birhanu Yemataw Balew-i (13:17.40) akok.

Bodhbarnü Sunil Kumar-i küm 13 sülen India nungger rongnungi Asian Games nung Greco-Roman asaya nung tang mezüngbuba medal ka nguogo. Pai, 87kg category nung Kyrgyzstan nungger Atabek Azisbekov koka bronze medal ngua liasü.

Kasa mapang nung boxing asaya nunga India tsür Lovlina Borgohain-i tetsür 75 kg Boxing final nung Silver medal ka nguogo.

Final asaya nung Lovlina-i China tsür Li Qian 5-0 agi mekoki liasü.

Borgohain-i, semifinal nung Thailand tsür Maneekon Baison 5-0 agi akok aser

taruba küm Paris Olympics atema jenjang ka nguteta liasü. Nikhat Zareen, Preeti aser Parveen Hooda nungger sülen Paris Olympics atema quota ngutetertem rongnung Borgohain pezübuba asayar kümogo.

Maneni India nungger archer Jyothi Surekha Vennam aser Ojas Deotale nati compound mixed team event nung South Korea nungger tarep So Chaewon aser Joo Jaehoon na koka gold medal nguogo.

Jyothi aser Ojas nati final asaya ya 159-158 ta point ka agi koka liasü.

Bodhbar anepdang Jyothi aser Ojas nati 159-154 agi Kazakhstan team koka final-i ia liasü. Zhexenbinova aser Andrey Tyutyun na den semifinal asayaba mapang India nungger tarep yagi 9 nung khen dang kashi aser tanungba ajak 10 nung dang kashia liasü. Iba masüdang India nungger tarep yagi quarter nung Malaysia nungger tarep 158-155 agi koker liasü.

Ano India nungger race walker Manju Rani aser Ram Baboo nati 35km mixed team event nung bronze medal nguogo. Tenati ghonda 5, minute 51 ser second 14 nung alizüng tongteta China (5:16:41) aser Japan (5:22:11) na sülen tasembuba jenjang nung tembanga liasü.

Taküm mezüngbuba Asian Games nung 35km race walk

mixed team event ya asayaogo. Iba asaya ya 2024 Paris Olympics nunga mezüngbuba asayatsü.

Bodhbarnü Neeraj Chopra aser Kishore Jena nati otsüsüsüsa Javelin Throw asaya nung gold aser silver medal nguogo. India nungger asayartemi tang mezüngbuba iba asaya nung mezüngbuba aser tanabuba jenjang nung takok ngutetogo.

Asaya nung Neeraj Chopra-i nület meter 88.88 tsüa gold angu aser Jena-i meter 87.54 tsüa silver medal ngua liasü.

Tunisia nung tir candidate...

Temepeshiba magütsü tsüngda tir nem takhangba agütsütsü asoshi Moussi ya party indang obendanger aser execution officers kati meiner oa liasü, ta parnoki ashi.

Free Destourian (Constitutional) Party ya 2016 küm nungi Moussi lenisüba nung inyaksangshia arudar aser parnoki taoba tir Zine El Abidine Ben Ali pusema liasü, shiba 2011 küm longkak kanga sashia aiba sülen atsüngtoka liasü.

Taoba ita ishika tsüngda Moussi-i aniba party yagi Saied anema longkak aitba sentong balala ayongzüka agia arudar. Parnoki ashiba agi pai pa mulungka nung yimsü asür aser ozüing alema telemtetba agir, ta Al Arabiya-i ashi. 2019 küm tir akümba sülen pai 2021 küm

BAM-i ayongzüka 2buba Boxing Camp agitsü

Mokokchung, Mongputeni/October 4 (TYO): Taküm July ita angati boxing coaching camp ka kanga takok ngua agiba sülen Boxing Association Mokokchung (BAM)-i district nung boxing asaya professional yimya nung ajungkettsü atema tongtibang jenjang ka agidar.

July ita camp ayongzüka agiba mapang nisung 165-i shilem agia liasü.

Tanabuba coaching camp ya arishi küm 9 nungi 14 tsüngda alir tetsür aser teburtem atema ayongzüka katsütsü.

Iba camp ya Department of Youth Resources & Sports (DYRS) aser Nagaland Amateur Boxing Association (NABA) na den longjemer BAM-i ayongzüka October 10 nungi 24 tashi agitsü. Camp mapang teyari agütsütsü asoshi professional boxing coach ka aser Nagaland nung boxing asayar tejen ana nübu yima lir.

Iba camp ayongzüka agitsü atema BAM-i jenjang ajak

agiatokogo aser P. Shilu Ao Park, Imkongmeren Sports Complex mekazüka yua lir.

Iba camp nung shilem agitsü atema Registration angati asütsü aser form Bio-Medical (Pharmacy) Imlong Place, Mokokchung nung angutsü.

Form ya October 9 nü 3:30 ako nungi tenzüka bendentsü aser iba mapang asayatem tenüng züngoksemtsü. October 9 nü kija asayatem tenüng züngoksemtsü aser tanga anogotem nung tenüng mezüngoksemtettsü.

Osang tejangjaba agitsü atema tejangrartemi item mobile number; 8131009944/8837003118 ajanga tongteprateptettsü. Maneni nüburtemi BAM Facebook page

#Boxing Association Mokokchung (BAM) follow süa osang tejangjaba agitettsü, ta BAM tir Lanuakum Imsong aser general Secretary

Bendangtemsü Ozükum nati sangdong ka ajanga metetdaksü.

TPL auction: Nagal sen timtiba agi alizükogo

Mongputeni/October 4, 2023 (Agencies): Tennis Premier League (TPL) season pongububa atema Sahara Star Hotel, Mumbai nung auction agiogo.

Sumit Nagal shiba tang All-India Tennis Association (AITA) No. 1 tebur kija asayar lir, pa TPL Season 5buba metenzük tsüngda league nung marquee asayar ama aniok aser pa ajak dang nungi sen timtiba agi alizüka liasü.

Tanga franchise temi kanga meranga toktepaka Gujarat Panthers puri pa sen lak 18.5 agi alizüka liasü. Gujarat Panthers purisa Karman Kaur Thandi sen lakh 8.5 agi alizükogo, shibai kija asaya nung ITF title asem bena lir.

Defending champions Hyderabad Strikers asoshi ajak dang sen timtiba agi alizükba asayaji Ellen Perez liasü. La sen lakh 14 agi alizük. Perez-i WTA Tour tarep asaya pongu, WTA Challenger Tour ana aser ITF Circuit nung kija asaya ana aser

tarep asaya 19 koka lir. Parnokisa Nikki Poonacha aser Saketh Myneni na alizüka liasü.

Kasa mapang nung Bengaluru SG Mavericks puri Arina Rodionova sen lakh 17.1 agi alizükogo aser la ya tetsür asayatem rongnung ajak dang sen timtiba agi alizükba asayar lir. La den Ramkumar Ramanathan (8.6 lakh) aser Vishnu Vardhan na alizükogo.

Pune Jaguars-ia Lukas Rosol, Rutuja Bhosale aser Manish Sureshkumar alizükogo aser Delhi Binny-i Dennis Novak, Jeevan Nedunchezhiyan aser Vaidehi Chaudhari alizükogo.

Maneni Punjab Tigers-i Conny Perrin, Arjun Khade aser Digvijay Pratap Singh shimogo. Mumbai Leon Army-i Ernest Gulbis Sowjanya Bavisetti aser Vijay Sundar Prashanth alizükogo aser Bengal Wizards-i Maria Timofeeva, Sriram Balaji aser Anirudh Chandrasekar alizükogo.

(Tapak 7 nungi...)

elected parliament shibangtsü aser decree agi yimsü asü tenzü.

Sorkar coup asüba atema aitsüba Saied-i magizük aser ashiba agi, pai iba jenjang agiba ya linük küm aika mepetmesü nung aruba bentettsü atema lir. Pai, sorkari pua alirtem ya, kiralongrar, tashioktsür aser ozüing raksartem ta shia arudar, ta Reuters-i metetdaksü.

Maneni Saied anemertem aikati tir anema longkak aita arudar. Parnok rongnung pongubo tepuokdak aliba opposition lenir Rached Ghannouchi den külemi lumia longkak ait tenzkogo. Ghannouchi-i aniba Ennahdha

party-i, opposition lenirtem anema jenjang agiba ya coup ketdangsürtem tashi atsülangshiba ka lir, ta ashi.

Moussi-ia, Tunisia atema la taküm bendanga agütsütsü renema lir ta shiogo.

Opposition lenirtem anema jenjang agiba mapang state security anema tasa asar ta shia Tunisia police-i yimden yimsüsür tongtibang 20 dak tema puogo.

Taküm küm tetenzüklen Abu Dhabi nung New York University indang politics professor Monica Marks-i osangbener dang ashiba agi, nüburtem ya temzüng ozüing alema pudendar.

BILEMDANGANG

"Kecha minykdangeriang aibelen mememar."